



# BILTEN

## OPĆINE SREBRENİK



IZDAJE: OPĆINA SREBRENİK • BROJ: 26 • MJESEC: DECEMBAR/PROSINAC 2008. • BILTEN JE BESPLATAN • TIRAŽ 500



CENTRALNO SPOMEN-OBILJEŽJE ŠEHIDIMA I POGINULIM BORCIMA 1992.-1995.



## ZNAČAJNI DATUMI

### Sjećanje na ZAVNOBiH



*Polaganje cvijeća borcima i šehidima na Centralnom spomen-obilježju*

Polaganjem cvijeća na Centralnom spomen-obilježju poginulim borcima i šehidima (1992-1995) na Trgu Alije Izetbegovića u Centru Srebrenika i na Spomen-kosturnici borcima NOR-a (1941-1945), 24. novembra je u Srebreniku započelo obilježavanje Dana državnosti BiH. Potom je u «Plavoj sali» Centra za kulturu i informisanje održana Svečana sjednica u povodu 25. novembra, na kojoj su, između ostalih, govorili načelnik Općine Srebrenik, Osman Suljagić, zatim predsjednik Udruženja boraca i antifašista NOR-a općine Srebrenik, Safet Ramić, te član Glavnog odbora NOR-a BiH, Sakib Čatić. Čatić je načelniku Suljagiću i predsjedniku MZ Tinja Donja Vejzović Fadilu uručio Plaketu u znak zahvalnosti zbog podrške ovome Udruženju.



*Priznanje načelniku od NOR-a BiH*

Potom je uslijedio kulturno-zabavni program gdje je ženski hor bošnjačke zajednice kulture «Preporod» izveo jednu pjesmu o Bosni i Hercegovini, a potom su članovi «Umjetničke radionice» odrecitovali i otpjevali nešto iz svog repertoara. Na kraju obilježavanja 25. novembra-Dana državnosti, otkrivena je, u dvorištu Osnovne škole u Podorašju, obnovljena spomen-bista Peri Bosiću, narodnom heroju iz Drugog svjetskog rata.



*U Podorašju je otkrivena obnovljena spomen-bista Peri Bosiću*

### OVE GODINE 65. ROĐENDAN BiH

Bosna i Hercegovina ove godine slavi 65. rođendan. Naime, 25. novembra 1943. godine u Mrkonjić Gradu je održano Prvo zasjedanje ZAVNOBiH-a, gdje su se sastali po prvi puta u historiji predstavnici srpskog, hrvatskog i muslimanskog naroda, te su kazali da «BiH nije ni srpska, ni hrvatska ni muslimanska, nego da je BiH i srpska i hrvatska i muslimanska». Nakon Dejtona, obzirom da nije usvojen Zakon o praznicima na nivou države BiH, ovaj praznik se slavi samo u Federaciji BiH, dok je u RS radni dan



*Gostima se predstavio i hor «Preporoda»*

# Centralno-spomen obilježje šehidima i poginulim borcima (1991-1995)



*Trenutak otvaranja Centralnog spomen-obilježja*

Izgovarajući 224 imena onih koji su položili svoje živote za odbranu Bosne i Hercegovine, 02.10.2008.godine je na centralnoj manifestaciji obilježavanja Dana šehida za područje TK-a, otvoreno Centralno spomen-obilježje šehidima i poginulim borcima-braniteljima sa područja općine Srebrenik u proteklom ratu. Ulica Alije Izetbegovića, koja je odnedavno pretvorena u Pješačku zonu, svakodnevno će nas podsjećati na sinove Bosne koji su položili svoje živote, kako bismo mi danas slobodno koračali našom domovinom.

## **FRA BLAŽ LIPOVAC: BOSNA JE BOŽIJI DAR**

Među zvanicama je bio i fra Blaž Lipovac, predstavnik Župe Špionica, koji je između ostalog kazao: -Molim vas nemojte dalje nakaziti Bosnu, jer je dovoljno unakažena kroz povijest. Čuvajte je onakvu kakva je od Boga stvorena, jer Bosna je Božiji dar, jer ovaj narod je Božiji dar. Ovdje izuzev Bošnjaka, Srba i Hrvata, žive i Mađari, Slovaci, Česi, Talijani..., pa nisu oni slučajno došli u Bosni. Došli su jer je ona lijepa i po mjeri čovjeka. Zato, dragi Srebreničani živimo jedni pored drugih, jer niko nikome ovdje ne treba da smeta. Onaj ko poštuje Kur'an i Bibliju, sigurno neće ni pomisliti da učini zlo drugome. Bosna nije ni Bošnjačka, ni Srpska ni Hrvatska, nego je ona svih njih.

Uz brojne goste sa viših nivoa vlasti, prisutnim majkama, sestrama, očevima, braći..., koji su brisali suze prisjećajući se svojih najmilijih, prvi se prisutnima obratio načelnik Općine Srebrenik, Osman Suljagić koji je između ostalog kazao: - I suviše dugo smo čekali da se izgradi ovo spomen-obilježje što su zaslužili oni koji su položili živote za odbranu naše domovine. Neka ovo

spomen-obilježje bude jedan mali znak zahvalnosti i neka to bude jedna opomena svima nama. Predsjedavajući Općinskog vijeće, doktor Ibrahim Zukić je potom izašao pred prisutne kojima je kazao: Ova 224 imena zaslužna su što mi danas kosti naših najmilijih ne tražimo po jamama. Ono sigurno neće narušiti suživot u Srebreniku, jer se suživot sastoji od tolerancije, uvažavanja, da možemo sretno živjeti jedni pored drugih i zajednički graditi nam jedinu zemlju BiH.

## **BILI SMO NA RUBU PROVALIJE**

Skupu se obratio muftija Tuzlanski, Husejn efendija Kavazović, koji je između ostalog istakao: -Naš narod je u jednom trenutku zaboravio na svoje korijene, pa je jedan među nama ustao i kazao «Mi smo Bošnjaci, mi smo Muslimani». Danas ovdje u njegovoj ulici, u ulici odnosno Trgu Alije Izetbegovića otvaramo Centralno spomen-obilježje sinovima Bosne. Bili smo na rubu provalije. A, onda su naša braća, sinovi i unuci svojim tijelima napravili most s jedne strane na drugu stranu provalije, a mi smo kao narod preko tog mosta prešli. Zato na Dan šehida, najviše dugujemo upravo njima.



*Svečanom otvaranju prisustvovalo je oko 5.000 ljudi*

Brojnim prisutnim gostima prigodnim govorima u povodu otvaranja Centralnog spomen-obilježja obratili su se i premijer Vlade TK, Enes Mujić, ministar za boračka pitanja u Vladi TK, Bahrija Mehurić te Zajkan Mrkaljević, predsjednik Udruženja porodica poginulih boraca. Svečanom otvaranju Centralnog spomen-obilježja prisustvovalo je blizu 5.000 ljudi, a opća je ocjena kako je ovo spomen-obilježje postavljeno na



*Premijer Mujić i ministar Mehurić odaju počast šehidima*

najbolje mjesto u Centru grada, s obzirom na važnost jednog ovakvog zdanja koje će podsjećati na 224 heroja koja su dala svoje živote za odbranu domovine.

## OPĆINSKO VIJEĆE

# Konstituirano novo Općinsko vijeće



*Vijećnici su položili zakletvu*

Na konstituirajućoj sjednici Općinskog vijeća Srebrenik, koja je održana 26.11.2008.godine, za predsjedavajućeg OV-a, tajnim glasanjem, izabran je primarius doktor Ibrahim Zukić, član SDA i dosadašnji predsjedavajući OV-a, dok bi njegov zamjenik, u naredne četiri godine, trebao biti Safet Omerović, član SBiH. Sedam predstavnika SDP-a u Općinskom vijeću Srebrenik, zbog toga je napustilo konstituirajuću sjednicu, nakon što nije udovoljeno njihovim zahtjevima da predsjedavajući OV bude kandidat iz ove stranke, Zlatko Šimić. Čak 22 glasa je dobio Ibrahim Zukić, a svega 2 Zlatko Šimić, dok sedam predstavnika SDP-a nisu glasali za izbor predsjedavajućeg OV-a Srebrenik.

### DEDIĆ UMJESTO MEHULJIĆA

Jusuf Mehuljić iz SDA jedini je izabrani vijećnik koji je odbio mandat budućeg vijećnika, iako je dobio dovoljan broj glasova na posljednjim lokalnim izborima. Umjesto njega Centralna izborna komisija imenovala je narednog kandidata sa liste ove stranke Mersudina Dedića-Hondu kao budućeg člana OV, koji je već na konstituirajućoj sjednici izabran na predsjednika Komisije za izbor i imenovanje.

SDA kao vodeća politička partija koja u zakonodavnoj vlasti od 29 članova broji čak 14 predstavnika, nije željela da odustane od toga da njihov član predsjedava Općinskim vijećem u naredne četiri godine, s obzirom da su dobili najviše glasova na prethodnim izborima. S druge strane u SDP-u smatraju da je prilikom izbora

predsjedavajućeg OV-a došlo do kršenja Amandman C4 u tački 5. Ustava FBiH, gdje se kaže da načelnik Općine i predsjedavajući OV-a iz višenacionalnih sastava ne mogu biti iz reda istog konstitutivnog naroda, izuzev onih općina u kojima jedan konstitutivni narod čini više od 80% stanovnika prema posljednjem popisu stanovništva iz 1991.godine. S obzirom da je po posljednjem popisu stanovništva na području općine Srebrenik živjelo 74% Bošnjaka, u ovoj stranci smatraju da je predsjedavajući trebao biti Zlatko Šimić iz reda hrvatskog naroda.

### SDP ĆE UČESTVOVATI U RADU OV-a

Nakon što su predstavnici SDP-a napustili sjednicu OV Srebrenik, postavlja se pitanje hoće li njihovi predstavnici i dalje učestvovati u radu zakonodavne vlasti u Srebreniku, na što su u ovoj stranci kazali: -SDP će i dalje učestvovati u radu OV-a Srebrenik, jer to je naša obaveza prema građanima koji su nam dali povjerenje na posljednjim lokalnim izborima. Prema tome mi moramo zastupati interese svih onih koji su nam dali povjerenje, kazao je Sejfudin Suljić, predsjednik Kluba vijećnika ove stranke.

Prije imenovanja predsjedavajućeg OV-a i njegovog zamjenika, sjednicu je pola sata vodio Mehmedalija Omić-Frenki, obzirom da je bio najstariji vijećnik (rođen 1944.godine). Nakon što su predstavnici SDP-a napustili sjednicu, ubrzo je to učinio i Omić. Inače, nakon što su predstavnici političkih partija dostavili imena kandidata za predsjedavajućeg OV-a, izabran je Birački odbor kojeg su činili doktorica Senada Kovač kao predsjednica ovoga tijela, te dva člana i to Omer Ibrišimović i Sadil Hrustić. Potom je Stručna služba Općinskog vijeća pripremila listiće gdje se pristupilo tajnom glasanju. Prema Zakonu Centralne izborne komisije BiH, predsjedavajući OV-a bira se tajnim glasanjem i to dvotrećinskom većinom, što je na kraju izabrani Ibrahim Zukić i imao, s obzirom da je za njega glasalo 20 od ukupno 29 vijećnika.



*Vijećnicima su uručeni Certifikati*

## INFRASTRUKTURA

# Deponija otpada u Babunovićima ispunila sve norme EU



*Deponija je urađena po EU normama*

Nedavno je, u sklopu redovnih inspekcijskih aktivnosti, deponiju otpada u Babunovićima kontrolisala komisija sastavljena od predstavnika Vlade TK-a i kantonalne inspekcije, nakon čega je kao jedina na TK-u, i kao jedna od svega nekoliko na području BiH, dobila prolaznu ocjenu. Kako je navedeno, radovi na sanaciji traju već drugu godinu, a urađeni su po projektno-tehničkoj dokumentaciji, i ova deponija je ispunila sve ekološke i sanitarne norme EU. S obzirom na probleme koji postoje sa realizacijom projekta buduće «Regionalne eko deponije», te katastrofalnog stanja koje vlada na deponijama otpada u ostalim općinama na području TK-a i BiH, ukratko ćemo podsjetiti šta je do sada uradila općina Srebrenik po ovom pitanju. Nakon što je općina Srebrenik otkupila zemljište u vrijednosti oko 160.000 KM, te nakon izrade i revizije projekta sanacije deponije otpada u Babunovićima, početkom marta 2007. g. krenula je realizacija I faze sanacije deponije otpada vrijednosti oko 892.000 KM, koju su radnici «ITK Musić» d.o.o. Srebrenik sa podizvođačima, uspješno okončali u aprilu 2008.g. Svi radovi na pripremanju podloge, prebacivanju ranije deponovanog otpada, izgradnji sistema za prikupljanje procjednih voda, sistema za otplinjavanje te završno prekrivanje nepropusnim slojevima i zemljom. Trenutno se izvode radovi na II fazi sanacije deponije otpada vrijednosti oko 425.000 KM, u sklopu kojih je završena izgradnja kasete površine 4000m<sup>2</sup> za odlaganje otpada u narednom periodu, a slijedi prekrivanje nove količine otpada nepropusnim slojevima i zemljom.

# Novih milion maraka za korićenje rijeke Tinje



*Novih milion maraka za korićenje rijeke Tinje*

Za korićenje rijeke Tinje i Slanjsanske rijeke do sada je utrošeno više od 800.000 KM. Nakon što je urađen i revidovan projekat nastavka korićenja rijeke Tinje od ušća Slanjsanske rijeke u rijeku Tinju prema mostu u naselju Kiseljak, u ukupnoj dužini od preko 1km, apliciralo se kod agencije «Vodno područje Slivovi rijeke Save» Sarajevo za potrebna sredstva. U veoma jakoj konkurenciji smo uspjeli dobiti novih 1,28 miliona KM za navedene radove i nakon okončanja tenderske procedure za izbor najpovoljnijeg izvođača radova je izabrana firma «Reweus» d.o.o. Lukavac, koja uveliko izvodi radove. Kako saznajemo od Ibrahi-

### PREDSLOVI ZA ZONU SPORTA I RAZONODE

Na taj način će Općina Srebrenik u svega par godina uspjeti izvršiti korićenje rijeke Tinje i Slanjsanske rijeke u dužini oko 3 kilometra, čime se osim zaštite od poplava gradskog središta i smanjenja eventualnih šteta koje mogu od nje nastati, stvaraju preduslovi za razvoj predviđene zone sporta i rasonode, koja predviđa postavljanje brane, izgradnju vještačke akumulacije za kupanje i pećanje, izgradnju igrališta za fudbal, košarku i tenis kao i sve prateće sadržaje.

ma Smajlovića, stručnog savjetnika za investicije i razvoj Općine Srebrenik, radovi uveliko teku i oni bi se trebali okončati početkom proljeća 2009.godine, a u međuvremenu je urađena i projektna dokumentacija za izgradnju pješačkog mosta na Kiseljaku, koji će se morati izvesti paralelno sa ovim radovima. Već nekoliko godina pješački most na Kiseljaku je u jako lošem stanju i konačno je došlo vrijeme da se i ovaj problem riješi, kako bi stanovnici ovog prigradskog naselja mogla sigurnije pješice prelaziti preko Tinje.

## INFRASTRUKTURA

# Saniran regionalni put Previle-Čelić



*Sanirana dionica puta Previle-Čelić od 2 km*

Nedavno su završeni radovi na sanaciji i rekonstrukciji regionalnog putnog pravca Previle - Čelić. Veoma oštećeni i frekventni putni pravac, do sada je bio prava noćna mora za vozače ali i pješake, tako da je Vlada TK-a, uz pomoć Federalne direkcije za ceste i manjim dijelom Općine Srebrenik, odlučila izdvojiti znatna finansijska sredstva za kompletnu sanaciju ovog puta u dužini od oko 2.000 metara. U prvoj fazi asfaltiranja regionalnog puta Previle - Čelić, radnici brčanske firme "Eko-prom", završili su potpunu rekonstrukciju puta na dionici od Previla do raskrsnice u Podorašju. Da se radi o ozbiljnom projektu i investiciji od blizu milion KM vidljivo je na svakom koraku. Novi asfaltni put je širok 6 metara, na jednom dijelu su urađeni trotoari, zatim novi most kod pumpne stanice vodovoda za Podorašje, postavljeni su metalni branici na svim opasnim mjestima, urađena je horizontalna i vertikalna signalizacija..., a do kraja godine duž većeg dijela izgrađene trase puta bi trebala biti urađena i savremena javna rasvjeta, projekat vrijednosti 42.000 KM, koji će podjednako financirati Općina Srebrenik i mještani MZ Podorašje. Na taj



način ovaj put je postao jedna od naj-savremenijih saobraćajnica, obezbjeđujući znatno bolje uslove za saobraćaj vozila ali i kretanje pješaka.

# Mustafići spojenim asfaltnim putem sa Čehajama

Nakon što je prethodnih mjeseci urađena kvalitetna priprema podloge i odvodnje površinskih voda, izvođač radova firma «Zvornik putevi» d.o.o. Sarna je, zahvaljujući angažmanu većeg broja vlastite moderne mehanizacije kao i sopstvene asfaltne baze, sredinom ove sedmice, u vrlo kratkom vremenskom periodu, uspjela asfaltirati preostalu dionicu puta Mustafići-Čehaje, u dužini od oko 1200m, vrijednosti oko 110.000 KM, te konačno spojiti ovaj put sa postojećim asfaltnim putem kroz Čehaje. Prethodno su, sredinom aprila 2007.g., završeni radovi na modernizaciji i asfaltiranju prve dionice puta od Mustafića ka Čehajama, dužine 1000m, širine 3m i ukupne vrijednosti izvedenih radova preko 65.000 KM. Navedeni radovi na asfaltiranju ukupno oko 2200m navedenog puta, u šta je utrošeno oko 175.000 KM su finansirani 30% sredstvima građana a 70% iz budžeta



*Asfaltirana preostala dionica puta Mustafići-Čehaje*

Općine Srebrenik. Zadovoljna lica mještana Čehaja a posebno malobrojnog pitomog naselja Mustafići, koje se nalazi u okviru MZ Čehaje i koje nikada do sada nije imalo kvalitetnu vezu preko Čehaja sa centrom Općine Srebrenik, što je dovelo i do iseljavanja većeg broja radno sposobnog stanovništva, govore više od bilo kakvih riječi. Od sada će mještani Mustafića, kvalitetnom asfaltnim putem, za svega desetak minuta, stizati u centar Općine. Kako su istakli predstavnici MZ-e Čehaje Husić Samid i Husić Alija, za uspješan završetak i ovog projekta, pored mještana Čehaja i Mustafića, najveću zahvalnost zaslužuje općinski načelnik Osman Suljagić, ali i lokalni biznismen Ibrić Hamzaliya zv. Jata, vlasnik firme izvođača radova, koji je, sa oko 13.000 KM vrijednim dodatnim radovima, pomogao asfaltiranje znatno šireg puta na dionici pored mezarja u Čehajama, kao i asfaltiranju jednog većeg oštećenja na postojećem putu kroz Čehaje.

## U Gornjim Hrgovima obnovljena vodovodna mreža vrijedna 119.000 KM



*Otvaranje obnovljenog rezervoara u G.Hrgovima*

U Gornjim Hrgovima je početkom oktobra upriličena svečanost na kojoj je općinski načelnik Osman Suljagić, svečanim presijecanjem vrpce, otvorio novoizgrađeni vodovod i rezervoar. Kako je na ceremoniji istakao Slobodan Babić, predsjednik Vijeća MZ Gornji Hrgovi, radovi su počeli prije 4 godine i rekonstruisano je oko 3000m vodovodne mreže te izgrađen rezervoar kapaciteta 100m<sup>3</sup>. Ukupna vrijednost investicije je oko 119.000 KM, a sredstava su osim mještana Gornjih Hrgova obezbijedili Ministarstvo poljoprivrede, vodoprivrede i šumarstva TK-a, Ministarstvo zaštite okoliša TK-a, Općina Srebrenik i Općina Gradačac. -Ovaj projekat je značajan jer je dugoročno riješeno pitanje vodosnadbijevanja ovog područja kao i mještana Jelovče Sela iz općine Gradačac. Mještani Jelovče Sela koriste navedeni vodovod ali je sada za njih ugrađen posebni cjevovod, čime je onemogućeno «divlje priključenje» i svojevrsna «krađa vode». Zahvaljujući međuopćinskoj saradnji kao i slozi samih mještana uspješno je priveden kraju i ovaj projekat i ovako treba raditi i ubuduće, jer svaka nesloga, koje je bilo i na početku realizacije ovog projekta, ne vodi ničemu dobrom i samo usporava realizaciju istih-istakao je načelnik Osman Suljagić prilikom otvorenja novog vodovoda. Nakon protokolarnog dijela u područnoj Osnovnoj školi u Gornjim Hrgovima domaćini su, za sve mještane i goste, organizovali prigodni koktel, na kojem se domaćinima naknadno pridružio i tadašnji načelnik Općine Gradačac Ferhat Mustafić.

## U Rapatnici asfaltirano novih 500 metara puta



*Novih 500 metara asfaltnog puta*

Samo nekoliko sedmica nakon asfaltiranja puta u zaseoku Sendići u Rapatnici, još jedan zaseok u ovom mjesnom području dobio je asfaltirani put. Naime, u prisustvu nekolicine mještana Rapatnice, predsjedavajući Općinskog vijeća Srebrenik, Ibrahim Zukić, koordinator za infrastrukturne projekte u Općini Srebrenik, Halid Kovač i predsjednik MZ Rapatnica, Senaid Kenović, svečano su otvorili novu dionicu puta u dužini od 500 metara. – Samo jedinstveni i složni možemo graditi ovakve i druge važne infrastrukturne projekte, a mi iz izvršne i zakonodavne vlasti smo tu da vam u tome neizmjeno pomažemo, kazao je ovom prilikom, predsjedavajući Općinskog vijeća Srebrenik, Ibrahim Zukić. Vrijednost ovog projekta je 56.200 KM, a 30% sredstava obezbijedili su mještani dok je preostalih 70% novčanih sredstava osigurala Općina Srebrenik.



*Mještani su zadovoljno prošetalii novim putem*

## Ulica Tuzlanskog odreda i put Seona-Rašljeva u novom ruhu



*Detalj sa rekonstrukcije ulice Tuzlanskog odreda*

Radnici firme «Road-ing» d.o.o. Gračanica, uveliko izvode radove na rekonstrukciji ulice Tuzlanskog odreda od tržnog centra «Bingo» do raskrsnice za Kiseljak, u gradskom području Srebrenika. -Vrijednost navedenih radova, sa rekonstrukcijom raskrsnice za Kiseljak, je oko 577.000 KM, a obzirom da je u pitanju zona gradskog građevinskog zemljišta, kompletni radovi će se financirati iz sredstava rente iz budžeta Općine Srebrenik. Početkom sljedeće godine sa početkom građevinske sezone će se pristupiti i rekonstrukciji raskrsnice sa Magistralnim putem kod tržnog centra «Bingo». Paralelno sa ovim radovima odvijali su se i radovi na rekonstrukciji puta Seona-Rašljeva u dužini od oko 1.000 metara, koje je izvela firma «ITK-Musić» d.o.o. Srebrenik. Radi se o investiciji od oko 132.000 KM koja se financira iz budžeta sa 70% sredstava, dok će ostalo obezbijediti građani, a značajna je zbog toga što se ovim putem uspostavlja znatno bolja i brža komunikacija sa susjednim općinama Gračanica i Lukavac, ističe općinski načelnik Osman Suljagić.



*Bolja komunikacija sa Gračanicom i Lukavcem*

## Sportski poligoni u Čehajama i Kugama



*Poligon u Čehajama*

U Čehajama je u dvorištu područne škole nedavno završena izgradnja sportskog poligona dimenzija 30x15m, koji je nakon pripreme terena, iskopa, temeljenja, betoniranja i izrade odvoda za odvodnju površinske vode i drugih grubih građevinskih radova, asfaltiran a ovih dana se vrši kompletno zatvaranje poligona sa svih strana metalnom ogradom visine 4 metra i plastificiranom žicom, kako se ne bi oštetila fasada i prozori obližnje područne škole i spomen-obilježje u Čehajama. Za navedeni poligon Općina Srebrenik je iz budžeta izdvojila oko 30.000 KM. Od izvođača radova smo saznali da će se ovaj poligon moći i zaključati, te na taj način spriječiti nelegalno korištenje, kao i osvijetliti sa obližnje škole za korištenje noću i organizovanje noćnih turnira u malom nogometu. Ista firma također je nedavno završila istovjetan sportski poligon, kod područne škole u Kugama, za šta je Općina Srebrenik iz budžeta izdvojila 23.000 KM.



*Poligon u Kugama*

## Naselje Neum bit će spašeno od klizišta



*Naselje Neum bit će spašeno od klizišta*

Naselje Neum u Srebreniku, koje se nalazi u blizini Druge osnovne škole, nedavno je pretvoreno u pravo gradilište. Naime, radnici firme «ITK Musić» d.o.o. Srebrenik, već nekoliko sedmica intenzivno rade na izgradnji odvodnih kanalizacionih krakova, zatim pripremanju podloge za polaganje asfalta kao i postavljanju ivičnjaka za uređenje trotoara. Riječ je o glavnoj ulici u ovome naselju dužine oko 1.000 metara i širine 3,5 metra kao i niz sporednih ulica koje će dobiti jednu sasvim novu dimenziju te bolji i ljepši izgled. Uz to, najveći značaj ovog projekta je taj što će se umnogome zaustaviti nestabilna padina koja je ozbiljno prijetila građanima ovoga naselja. U pitanju je projekat vrijedan blizu 2 miliona maraka, a u ovu prvu fazu iz budžeta Općine Srebrenik je investirano 255.000 KM.



*U Naselje Neum bit će investirano 2,5 miliona KM*

## Uskoro novi objekti u Srebreniku



*Započela izgradnja «Čehajke» kod Doma zdravlja*

Nakon pripremnih radova odnosno izmještanja stubova NN mreže, krajem oktobra su zvanično započeli radovi na izgradnji stambeno-poslovnog objekta «Čehajka» u ulici 1.marta u Centru Srebrenika. Kako smo saznali od jednog od investitora Nezira Ibrića iz Srebrenika, radi se o savremenom objektu koji će imati suteran, prizemlje i dva sprata i čija se ukupna vrijednost procjenjuje na oko 2 miliona KM. Trenutno se nakon zemljanih radova-iskopa na polovici objekta,



*Poslovni objekat kod MSŠ Srebrenik*

vrši betoniranje investitora Ibrića, a uskoro bi se trebali isti radovi nastaviti i na preostaloj polovici objekta. Izgradnjom stambeno-poslovnog objekta «Čehajka» ovaj dio Centra Srebrenika dobit će sasvim drugačiji i ljepši izgled. Osim ovog objekta uveliko se izvode



*Izgled budućeg SPO-a kod zgrade Druge OŠ*

radovi na novim objektima koje grade firme «Gromeks», «Sekvoja», pri kraju su radovi na SPO investitora Bešić Svjetlana, kao i poslovni objekat Čosić Senadina, dok se najavljuje početak izgradnje i novog stambeno-poslovnog objekta iza Druge osnovne škole investitora Ibračević Sakiba.

## ŠKOLSTVO

### Vlada Turske pomogla rekonstrukciju OŠ Špionica



*Direktor Ibrić sa donatorima iz Turske*

Zahvaljujući donacijama Vlade Turske i Ministarstva obrazovanja Tuzlanskog kantona, u Osnovnoj školi «Špionica» uspješno je realiziran projekt sanacije školske zgrade. U okviru ovog projekta zamijenjeno je oko 70 posto dotrajalih prozora na školskoj zgradi, a sredstva u iznosu od 80.000 maraka donirali su Turska uprava za međunarodnu saradnju i razvoj «TIKA» i Vlada Tuzlanskog kantona. Prema riječima Senaida Ibrića, direktora OŠ «Špionica», do početka zime planirali su zamijeniti i preostalih 30 posto dotrajalih prozora, a sredstva za njihovu nabavku, u okviru šireg projekta pomoći Turske narodu BiH, obećali su donirati humanitarci iz Turske. Narednih dana



započet će i zamjena parketa i sanacija mokrog čvora u školskoj fiskulturnoj dvorani, a sredstva u iznosu od

50.000 KM osigurat će Federalno ministarstvo obrazovanja. Završetkom svih ovih poslova, ističe Ibrić, školska zgrada koja je u toku prošlog rata služila i za smještaj prognanika, dobit će sasvim ljepši izgled.

### Izvrstan uspjeh učenika Prve osnovne škole Srebrenik

Pedagoški zavod Tuzla i Ministarstvo obrazovanja, nauke, kulture i sporta TK, prilikom ocjenjivanja rada 85 osnovnih škola sa područja TK-a, «Prvu osnovnu školu» Srebrenik proglasio je drugom najboljom školom na našem kantonu, odmah iza OŠ «Novi Grad» Tuzla. Ocjene su dodjeljivane prema devet kriterija i to: uspjehu učenika, realizaciji utvrđenog obima odgojno-obrazovnog rada, vannastavnim aktivnostima, školskoj biblioteci, nastavnom kadru, radu stručnih organa škole, radu direktora te njegovih pomoćnika i pedagoga, stanju objekta, dvorišta i sportskih terena te na osnovu postignutog uspjeha na takmičenjima i smotrama. – Najviše smo bodova dobili



*Direktor Prve OŠ Srebrenik Hasan Nurikić*

na osnovu postignutih rezultata na takmičenjima i smotrama. I to takmičenjima u tehničkom stvaralaštvu, u likovnim i literarnim takmičenjima, zatim u takmičenjima u fotografiji gdje je naš učenik Emir Kovač bio sudionik Svjetskog kupa mladih do 16 godina u Bratislavi, kaže Hasan Nurikić, direktor «Prve osnovne škole» Srebrenik. Kada su u pitanju ostale škole s područja općine Srebrenik, OŠ «Sladna» je na 13. mjestu sa 2.482 boda, «Druga osnovna škola» Srebrenik je 22 sa 2.186 bodova, OŠ «Duboki Potok» je 27 sa 2.120 bodova, OŠ «Tinja» je 39 sa 1.950 poena, zatim slijede OŠ «Podorašje» na 40. mjestu sa 1.937 poena, OŠ «Rapatnica» je na 46. mjestu sa 1.880, dok je na 60. mjestu OŠ «Špionica» sa 1.722 boda.

## INTERVJU SA NAČELNIKOM OPĆINE SREBRENİK, OSMANOM SULJAGIĆEM

**BEZ OBZIRA NA GLOBALNU EKONOMSKU KRIZU,  
OČEKUJEM POVEĆANJE BUDŽETA 3 DO 5%**

**OTVARANJE NOVIH PROIZVODNIH POGONA, TOPLIFIKACIJA GRADA I PRIGRADSKIH NASELJA, IZGRADNJA NOVE ZGRADE OPĆINE, RAZVOJ TURIZMA, NASTAVKA KORIĆENJA TINJE, RJEŠAVANJE PROBLEMA VODNOSNADBIJEVANJA... SAMO SU NEKI OD PROJEKATA**



*Gospodine načelniče, prije svega čestitke na još jednom mandatu na mjestu prvog čovjeka Općine Srebrenik. Iskreno, jeste li se nadali ovakvim rezultatima?*

- Hvala! Mi smo i očekivali ovakve rezultate. «SDA» je povećala broj vijećnika u zakonodavnoj vlasti što je i bio naš cilj. S obzirom da u novom sazivu OV sada participiraju i tri nove političke stranke, vjerujem kako ćemo bez obzira na to, u naredne četiri godine raditi u jednoj korektnoj i «zdravoj» atmosferi, kaže načelnik Općine Srebrenik, Osman Suljagić.



*U protekle četiri godine Vašeg mandata općina Srebrenik je doživjela jedan veliki infrastrukturni procvat. Je li urađeno sve što ste zamislili i u kojoj mjeri ste zadovoljni, te koji su to projekti koje ste planirali uraditi?*



**Načelnik Osman Suljagić**

- Čovjek nikad ne treba da bude zadovoljan. Urađeni su brojni projekti u oblasti komunalne infrastrukture. Prije svega planirali smo uraditi veće projekte koji su realni, a to je nova zgrada Općine, projekat toplifikacije Centra i prigradskih naselja, uređenje i privođenje namjeni Starog grada, projekat toplifikacije Centra i prigradskih naselja, urede-

nje i privođenje namjeni Starog grada, nastavak regulacije rijeke Tinje... Zatim tu je rekonstrukcija regionalnih puteva prema Orahovici, zatim Sladnoj kao i regionalni put Preville-Podorašje-Jasenica. To su projekti na kojima treba dosta raditi kako bi se oni i realizirali. To su dakle ti krupniji infrastrukturni projekti, a naravno da ima i drugih.



*Pitanje vodosnadbijevanja na području općine Srebrenik jedno je od najosjetljivijih. Mnoga naselja imaju problema sa napajanjem zdravom i pitkom vodom. Šta se može očekivati po tom pitanju?*

- U narednom četverogodišnjem mandatu moj cilj prije svega bit će posebno usmjeren na rješavanje ovog problema kao i odvodnje fekalnih i površinskih voda. Znamo za taj krupni problem i upravo zbog toga ćemo se mnogo angažirati na tim projektima.



*Centar Srebrenika je izgradnjom Pješačke zone dobio jedan sasvim novi izgled koji posjeduju gotovo sve urbane sredine. Šta se može dalje očekivati kada je u pitanju Centar ali i ostala područja?*

- Smatram da je Srebrenik zaslužio da ima ovako uređen Centar sa Centralnim spomen-obilježjem. Započeli smo rekonstrukciju ulice Tuzlanskog odreda prema tržnom centru «Bingo», a tu je i završetak radova na Gradskoj deponiji u Babunovićima. Mi smo u dosadašnjem periodu nastojali da se što ravnomjernije ulaže u infrastrukturu a to pokazuju i izvještaji s terena.



*Zapošljavanje je jedan od najvećih problema u cijeloj BiH, posebno kada nam predstoji jedna globalna kriza u kojoj prijetite otpuštanja radnika. Šta možemo očekivati u narednom periodu kada je u pitanju otvaranje novih radnih mjesta?*

## VIJEĆNICI OPĆINSKOG VIJEĆA SREBRENİK



Ibrahim Zukić (SDA)



Senada Kovač (SDA)



Mersudin Dedić (SDA)



Fatima Džaferović (SDA)



Sedina Suljkanović (SDA)



Ešref Harčinović (SDA)



Hamid Mutapčić (SDA)



Adis Fazlić (SDA)



Nedžad Delić (SDA)



Mirsad Bašić (SDA)



Fahir Zukić (SDA)



Mirza Ibrišimović (SDA)



Nermin Okić (SDA)



Izudin Zahirović (SDP)



Suad Jašarević (SDP)



Zlatko Šimić (SDP)

**Zihher Suljić (SDP)****Mustafa Muratović (SDP)****Sejfidin Suljić (SDP)****Mehmedalija Omić (SDP)****Safet Omerović (S BiH)****Omer Ibrišimović (S BiH)****Sumedin Nišić (S BiH)****Amir Husarić (LDS)****Sadil Hrustić (LDS)****Ibrahim Salihović (BPS)****Mirza Ordagić (RZB)****Novalija Dedić (GDS)****Mevljudin Ibraimi –  
predstavnik nacionalnih  
manjina**

Najveći broj vijećnika (14) u OV Srebrenik ima SDA, koja je na izborima osvojila 7.360 glasova (40,38%) i u naredne 4 g. to su: Ibrahim Zukić, Hamid Mutapčić, Adis Fazlić, Senada Kovač, Fatima Džaferović, Ešref Harčinović, Sedina Suljkanović, Nermin Okić, Mirza Ibrišimović, Mirsad Bašić, Fahir Zukić, Nedžad Delić i Mersudin Dedić (umjesto Jusufa Mehuljića). Drugi po broju osvojenih glasova je SDP sa 4325 glasa (23,73%), odn. sa 7 mandata i to su: Zihher Suljić, Zlatko Šimić, Sejfidin Suljić, Mehmedalija Omić, Izet Zahirović, Suad Jašarević i Mustafa Muratović. Stranka za BiH osvojila je 1529 glasova (8,39%) odn. 3 vijećnika a to su: Omer Ibrišimović, Safet Omerović i Sumedin Nišić. LDS-a je osvojila 1289 glasova (7,07%) odn. 2 vijećnika i to su: Amir Husarić i Sadil Hrustić. Po prvi puta u zakonodavnoj vlasti Srebrenika su BPS, koja je dobila 837 glasa (4,59%) a ispred ove stranke u OV Srebrenik sjedit će Ibrahim Salihović, Stranka radom za boljitak sa 788 glasa (4,32), koju predstavlja Mirza Ordagić kao nosilac liste kao i GDS, koja je osvojila 686 glasa (3,76%) a vijećnik je nosilac liste Novalija Dedić. Sa osvojenih 30 glasova u OV je izabran Mevljudin Ibraimi, predstavnik nacionalnih manjina, kojeg je podržala SDA.

- U oblasti proizvodnih, uslužnih i drugih djelatnosti, mi imamo određene projekte. Prije svega posebno ćemo se usmjeriti na pronalaženje prostora za uspostavljanje poslovnih zona. Te poslovne zone prije svega moraju biti na društvenom zemljištu, a mi smo Općina koja ima vrlo malo društvene zemlje, za razliku od općina iz našeg okruženja i tu smo u deficitu u odnosu na njih. Mi ćemo se usmjeriti na naše domaće investitore i nastojati njima pomoći kako bi ostvarili svoje projekte. Mi očekujemo da će već 2009. godine «Kopex», «Sinbra», «Marković», «Omega» ...započeti sa realizacijom svojih projekata, a, već smo obavili neke razgovore i sa onima koji žele uspostaviti svoje proizvodne kapacitete na području općine Srebrenik, a uveliko teku razgovori sa predstavnicima «Binga» da se u okviru «Corn-Flipsa» u Babunovićima pokrene jedan proizvodni pogon koji bi zaposlio jedan veći broj radnika.



*Srebrenik će se i dalje razvijati*



*Od kako ste došli na mjesto načelnika, svake godine se povećavao općinski budžet. Možemo li očekivati tu tendenciju rasta i u narednim godinama?*

- Globalna ekonomska kriza se već osjetila i ove, dakle 2008.godine. Ove godine je bio planiran budžet od blizu 14.miliona maraka, a realno je očekivati kako će biti realiziran negdje do 12,5 miliona maraka. Sada je već jasno kako će 2009. i 2010. godina biti teže za privredni razvoj. Iskreno, ja se nadam da će ipak nivo budžetskih sredstava iz godine u godinu biti u porastu, ali ne u nekom velikom obimu, upravo zbog ove krize. Sigurno je da neće biti tako izražen porast kao u proteklom periodu. Fiskalno vijeće FBiH već nam je dalo određene smjernice po pitanju Nacrta budžeta za narednu godinu tako da se to povećanje može planirati svega 3-5% u odnosu na ovu godinu. Ima

i većih zahtjeva od poreznih obveznika, ali to je nerealno očekivati.

### SREBRENİK JE OTVOREN GRAD

- S obzirom da su iza nas Bajramski blagdani, želim sa zakašnjenjem da čestitam svim Muslimanima ove blagdane, a Katolicima i Pravoslavicima predstojeće božićne, kao i svim građanima novogodišnje praznike, sa željom da ih dočekaju u miru i blagostanju, sa vjerom u bolje dane za sve nas. Srebrenik je uvijek bio otvoren grad za sve one koji žele da ovdje grade, rade i stvaraju svoju perspektivu. Bez obzira na političku, religioznu, spolnu i bilo koju drugu pripadnost, mi smo svi Srebreničani i tako treba da se osjećamo jer ovo je naš Grad i naša Općina, kaže načelnik Suljagić.



*Novi sastav Općinskog vijeća se razlikuje od prethodnog i dosta je heterogeniji s obzirom da sada u OV imamo i novih političkih partija. Kakvu saradnju očekujete sa zakonodavnom vlašću?*

- Očekujem kako će saradnja između zakonodavne i izvršne vlasti biti na visokom nivou, obzirom da je potrebno opravdati ukazano povjerenje građana. Svi mi treba da radimo prije svega u interesu građana i cijele općine Srebrenik i mislim da tu neće biti problema bez obzira na posljednja dešavanja sa izborom predsjedavajućeg OV Srebrenik.



*Šta biste poručili građanima općine Srebrenik uoči Vašeg novog četverogodišnjeg mandata?*

- Prije svega želim da budu strpljivi u realizaciji svojih želja i da imaju maksimalno razumijevanje, s obzirom na cjelokupnu situaciju. Realizirati sve projekte možemo uz razumijevanje jedni drugih, uz jednu toleranciju i želju da uspijemo. Mi smo i do sada uvijek bili otvoreni za građane a tako će biti i u narednom periodu. Do sada smo većinu projekata realizirali sa građanima po principu 50-50 odnosno 70-30, a u zavisnosti od cjelokupne situacije, nastojat ćemo da građani što manje, a Općina što više učestvuje u izdvajanju sredstava. Još jednom želim da se zahvalim građanima općine Srebrenik što su izašli na Izbore i što su mi ukazali još jedno povjerenje a ja ću nastojati da ga ponovo opravdam, kaže načelnik Općine, Osman Suljagić.

## Popularizacija inovatorstva na području općine Srebrenik



*Inovatorstvo bi trebalo dobiti na značaju*

«Udruženje inovatora Srebrenik» (UIS) je krajem novembra održalo okrugli sto na temu: «Popularizacija inovatorskog rada u osnovnim i srednjim školama». Između ostalog navedeno je kako se ovo Udruženje, uspjelo izboriti za «Podsticanje inovatorske djelatnosti», dobivši novčana sredstva od nadležnog Federalnog ministarstva, radi unapređenja aktivnosti Udruženja inovatora, ocjene o potrebi popularizacije i dodatnog podsticaja inovatorstva, kod svih građana koji imaju predispozicije da se aktiviraju kao inovatori, a posebno kod učenika osnovnih i srednjih škola, te radnika u proizvodnim firmama u Srebreniku. -Želimo da u narednom periodu od 12 mjeseci, animiramo, educiramo i podignemo nivo svijesti građana o inovatorstvu, kako bi se u navedenu aktivnost aktivno uključio što veći broj građana, posebno mlađe generacije. Zbog toga me raduje prisustvo oko 30 profesora informatike i nastavnika TO, direktora OŠ kao i nagrađivanih učenika, jer je bit da privučemo mlade tehničkoj kulturi i da je oni zavole, a iz kvantitete će nastavnici znati prepoznati kvalitet, koji zavređuje da mu se pomogne odn. da se njihove ideje pokušaju realizovati i zaštititi patentom-istakao je Abdulah Smajlović, ugledni srebrenički inovator i član užeg rukovodstva UIS-a.

## Učenici MSS Srebrenik ugostili vršnjake iz Orašja

Povodom 16. novembra Međunarodnog dana tolerancije, Misija OSCE-a u BiH je 19. novembra 2008. godine organizovala posjetu i druženje učenika Mješovite srednje škole „Fra Martin Nedić“ iz Orašja sa učenicima Mješovite srednje škole Srebrenik. Nakon održane press-konferencije srednjoškolci iz Srebrenika su, za svoje goste, izveli predstavu “Garavi sokak”, po

motivima poezije Mike Antića, nakon čega su, svi zajedno, učestvovali u radionici pod nazivom «Naše viđenje tolerancije». Cilj ovog projekta je, kako je navedeno na radionici, unapređivanje tolerancije i poštovanja različitosti u školskoj zajednici i društvu uopće, te uspostavljanje veza između učenika ove dvije škole. Druženje u Srebreniku je završeno zajedničkom posjetom Starom gradu u Gornjem Srebreniku, dok bi uzvratna posjeta trebala biti organizirana sredinom decembra ove godine.



*Sa predstave «Garavi sokak»*

## Osnovci dobro poznaju mine

Učenici osnovnih škola iz Lukavca pobjednici su 11. Kantonalnog takmičenja osnovnih škola o poznavanju opasnosti od mina «Pazi mine», koje je nedavno održano u OŠ Špionica. Na ovome takmičenju učestvovalo je 36 učenika raspoređenih u 12 ekipa, a sa područja TK jedino se nije pojavila školska ekipa iz Kladnja. Drugo mjesto ostvarila je Kalesija, a treće ekipa Teočaka, dok su predstavnici osnovnih škola Srebrenik, zauzeli 8.mjesto. – Crveni križ Tuzlanskog kantona u saradnji sa Kantonalnom upravom Civilne zaštite te ovoga puta sa Crvenim križom Srebrenik, svake godine organiziraju kantonalno takmičenje osnovnih škola o poznavanju mina, gdje učestvuju učenici V, VI i VII razreda. Cilj ovog takmičenja je da djeca kroz igru i zabavu što više nauče koliko su mine zapravo opasne. Mi smo jako zadovoljni kako su djeca demonstrirala znanje o minama kroz teoretsko znanje i igru detekcije, kazala je Merima Sarajlić, predstavница Crvenog križa TK.



*Osnovci su pokazali zavidan nivo znanja o minama*

## ZAPOŠLJAVANJE

### 30 pripravnika dobilo posao



*Pripravnici nisu krili oduševljenje*

Početak oktobra 30 pripravnika sa područja općine Srebrenik potpisalo je ugovore o početku odrađivanja pripravničkog staža u osnovnim i Mješovitoj srednjoj školi Srebrenik. Tako će svršeni visokoobrazovani mladi ljudi sa ovog općinskog područja biti u prilici da sa završetkom ove školske godine dobiju priliku za polaganje Stručnog ispita a nakon toga da ravnopravno konkurišu za određeno radno mjesto u bilo kojoj školi u BiH. – U saradnji sa Ministar-


#### POTPISNICI UGOVORA

Mirza Mujkić, Reuf Vikalo, Jasmina Nurikić, Mirela Musić, Samir Selimović, Veldisa Halilović, Sabrina Moranjković, Edin Bešić, Hasiba Džaferović, Meliha Fazlić, Edita Hodžić, Mejra Kafedžić, Selma Borić, Adisa Husejnović, Perica Ivanek, Jasmin Beganović, Adis Hogić, Mirel Husić, Adnana Selimović, Miralem Hodžić, Kenan Moranjković, Mirnela Džafić, Lejla Bajrektarević, Merima Muslimović, Edita Zahirović, Edisa Likić, Enisa Mujić, Alma Halilović, Dijana Brašnjčić i Samra Beganović.

stvom za obrazovanje, nauku, kulturu i sport u Vladi TK, sklopili smo ovaj sporazum, kako bi ovi mladi ljudi dobili priliku da dobiju posao. Mi smo za narednu budžetsku godinu planirali da iz budžeta izdvojimo za ove namjene blizu 90.000 KM. Prilikom odabira ovih ljudi rukovodili smo se dužinom boravka na Birou za zapošljavanje kao i socijalnim statusom, kaže načelnik Općine Srebrenik, Osman Suljagić.

## Udruženju civilnih invalida donirana mašina za sito-štampu

Udruženju civilnih invalida I i II kategorije Srebrenik, početkom oktobra je uručena mašina za sito-štampu, koja služi za izradu reklamnog materijala, čime će dva invalida dobiti posao. U pitanju je donacija grupe građana koja je inicirala ovaj projekat i koji je ovih dana zaživio. Predsjednik Udruženja Enes Džanić na press-konferenciji koja je upriličena zbog ovog događaja, zahvalio se svima onima koji su pomogli ovaj projekat, posebno Mirzi Ordagiću, direktoru firme «BH Motors» i novom članu OV Srebrenik, ispred Stranke radom za boljitak, zatim Senadu Ferizoviću, kao i nekolicini drugih donatora ovoga projekta.



*Mašina je uručena Enesu Džaniću*

#### POSAO ZA DVA ČLANA UDRUŽENJA

–Ovo je uistinu veliki gest naših građana i zahvalni smo im na ovome, posebno jer bi od ove donirane mašine, dvije porodice trebale da poprave svoj socijalni status. Oni će uskoro boraviti u Žepču četiri-pet dana, kako bi se stručno obučili za rad na istoj, kazao je Džanić.

Udruženje civilnih invalida I i II kategorije Srebrenik formirano je 2005. godine, ima 1.500 svojih članova, od kojih je njih 30 aktivno. U principu se samofinansiraju, uz podršku Općine Srebrenik. Do sada su imali nekoliko projekata i to formiranje baze podataka invalida, baze socijalne karte korisnika te izrada web stranice: [www.srebrenik-almanah.biz](http://www.srebrenik-almanah.biz), na kojoj su predstavljeni poslovni subjekti s područja općine Srebrenik.

## JAVNE RASPRAVE

# Problemi vodosnadbijevanja, napajanja strujom...

Nedavno su održane javne rasprave po pitanju budžeta Općine Srebrenik za 2009.g., infrastrukture, kapitalnih investicija i uređenja gradskog građevinskog zemljišta, u svim mjesnim područjima općine Srebrenik, gdje su građani predstavnicima izvršne vlasti Općine Srebrenik iznijeli svoje zahtjeve, sugestije, mišljenja..., šta bi to oni željeli da se u narednoj godini riješi po pitanju infrastrukturnih i drugih projekata. U mjesnom području Podorašje, mještani Drapnića su insistirali na rješavanju problema ulične rasvjete u Drapnićima, za koju imaju elektro-projekat, urbanističku i građevinsku dozvolu te prikupljen



*Sa Javne rasprave u Tinji*

gotovo sav novac, ali obzirom da se trenutno izvodi javna rasvjeta u Podorašju I, plaše se odgađanja izgradnje njihove rasvjete u 2009.godini, što bi se moglo negativno odraziti na prikupljanje sredstava od strane građana za ovu, ali i ostale, akcije. Također su insistirali na putu i mostu za ovo naselje, zatim pristupnom putu za groblje kod crkve sv. Petra, rekonstrukciji vodovoda u Jasenici i Crvenom brdu, problemu niskonaponske elektro-mreže...U mjesnom području Tinja mještani su najviše govorili o rješavanju problema vodosnadbijevanja, te da se umjesto vršenja bušotine započne sa priključenjem vode iz Špionice, kako bi 10.000 stanovnika imalo pitku vodu. Uz problem vode u Tinji su istakli i veliki problem sa nekvalitetnim napajanjem električnom energijom. Istaknut je i problem sa grijanjem u OŠ «Tinja». Javna rasprava u mjesnom području Duboki Potok protekla je u iznošenju problema mještana po pitanju vodosnadbijevanja i kanalizacione mreže u Dedićima, kao i vodosnadbijevanja u Ljenobudu, nastavku rješavanja zagađenosti izvorišta «Kugičko vrelo» kroz

ugradnju filtera, prečistača, omekšivača vode... Naglašena je i potreba korićenja rijeke Tinje i kroz ova naselja, obzirom da usljed većih kiša prijete poplave...Mještani Špionice su na javnoj raspravi istakli želju da se sanira put «Orion»-Gornji Hrgovi, mjesna škola, čitaonica, zatim sanacija nekoliko njijskih puteva. Potertana je i potreba sanacije puta od «Badelke» do OŠ. «Špionica» kao i potrebu otvaranja ambulante porodične medicine, te potrebu korićenja rijeke Tinje. U Sladnoj su na javnoj raspravi mještani ovog mjesnog područja istakli potrebu izgradnje sportskog poligona u Lušnici, zatim rekonstrukciju vodovoda, asfaltiranje nekoliko makadamskih puteva, pojačanje slabog napona električne-energije, poboljšanja u održavanju puteva... O problemu vodosnadbijevanja govorilo se i na javnoj raspravi u Rapatnici, gdje se sa ovim problemom susreću u Gornjim Moranjcima i Falešićima, zatim o potrebi rekonstrukcije niskonaponske mreže na Kiseljaku, asfaltiranju puta Brda-Babunovići, kanalizacije u Čekanićima kako bi se zaštitilo izvorište pitke vode. Posljednja javna rasprava održana je za Grad i prigradska naselja, gdje su građani insistirali na asfaltiranju Majevičke ulice, izmještanju Veterinarske stanice kao i Stočne pijace u Čehajama, uređenje izvorišta Kiseljak, sanaciji izletišta «Šehitluci», pristupnog puta prema «Starom gradu», vodosnadbijevanje naselja Ravnuše, odvodnje oborinskih voda u Bijelića brdu, povećanje sredstava za rad nevladinih organizacija, organizovanog dočeka Nove godine u Centru Srebrenika, problema priključka na elektro-mrežu u Majevičkoj ulici, problem prostorija MZ Bare...Izneseni su također i problemi sa PTT-om, gdje ovo preduzeće nakon obavljenih iskopnih radova u pojedinim ulicama, iza sebe ostavlja prokopane ulice i trotoare. Iz MZ Srebrenik 2 naglašeno je kako bi u ovoj MZ-i trebalo vrlo brzo započeti sa izgradnjom parka i dječijeg igrališta, obzirom da djeca u ovom dijelu Sreb-

### URADIT ĆE SE KOLIKO BUDE NOVCA

Na svim javnim raspravama evidentne su velike želje i prohtjevi stanovnika općine Srebrenik, koji žele bolje uslove života. – Mi u Općini Srebrenik smo svjesni potreba naših građana, ali isto tako i oni trebaju imati razumijevanja da možemo uraditi u zavisnosti koliko bude bilo novca u budžetu. Nastojat ćemo da rješavamo prvo one već započete projekte te prioritetnije zadatke, kazao je načelnik Općine Srebrenik.

renika imaju vrlo malo prostora za igru. Inače na svim javnim raspravama evidentne su velike želje stanovnika općine Srebrenik, koji žele bolje uslove života. O navedenim dokumentima će na narednoj sjednici OV-a Srebrenik raspravljati i općinski vijećnici, te postoji vrlo velika mogućnost da u finalnim verzijama ovih dokumenata budu uslišene i neke od želja građana..

## SPOMENICI

### Šehidima Sofića otvoreno spomen-obilježje



*Sjećanje na osam šehida Sofića*

Šehidima Sofića, prigradskog naselja Srebrenika, 01.11.2008. godine svečano je otvoreno spomen-obilježje. Uz brojne goste sa viših nivoa vlasti, prisutnim majkama, sestrama, očevima, braći..., koji su brisali suze prisjećajući se svojih najmilijih, prvi se obratio načelnik Općine Srebrenik, Osman Suljagić, koji je između ostalog kazao: -Ovo spomen-obilježje svakodnevno će nas podsjećati na 8 sinova Bosne iz naselja Sofići, koji su položili svoje živote, kako bismo mi danas slobodno koračali našom domovinom. Neka ovo spomen-obilježje bude jedan mali znak zahvalnosti i neka to bude opomena svima nama. Predsjednik Saveza porodica poginulih boraca i šehida TK-a Hajrudin Halilović se zahvalio izvršnoj i zakonodavnoj vlasti Srebrenika, što kroz pomoć u izgradnji spomen-obilježja ne zaboravljaju svoje najbolje sinove, te izrazio nadu da će se nastaviti pomagati i porodicama poginulih boraca i šehida. Emir efendija Brašnjic je upozorio da ovih 8 poginulih boraca sa područja Sofića odn. 224 borca koji su poginuli sa područja kompletne općine Srebrenik, treba da budu opomena da nam se ovo više ne ponovi, a ne kao do sada, kada se brzo zaboravljao zločin i isti se ponavljao iz generacije u generaciju. Nakon dodjele diploma najzaslužnijim pojedincima na svečan način je otvoreno spomen-obilježje u Sofićima, nakon čega su predstavnici brojnih udruženja na spomen-obilježje položili cvijeće te učenjem fatihe odali počast poginulim borcima sa ovog općinskog područja.

### U Špionici restaurirana džamija iz 17.vijek

Odlukom Komisije za zaštitu kulturno-historijskih spomenika BiH, Stara džamija sa haremom u Špionici Donjoj kod Srebrenika, dobila je status nacionalnog spomenika pod zaštitom države. Riječ je o jednom od najstarijih objekata u BiH, koji je, uprkos brojnim sanacionim radovima, zadržao svoj autentičan izgled. Prema istraživanjima prof. Edina Mutapčića naselje Špionica se u pisanim historijskim izvorima prvi puta spominje u 15. vijeku, a džamija je, kako se pretpostavlja, sagrađena u prvoj polovini 17. vijeka. Osnova munare je od kamena i drveta a u novije vrijeme je presvučena metalnim limom, što se konzervatorskim radom uklonilo, čime je munari vraćen prvobitan izgled. Noseći zidovi samog objekta su od kamena debljine 90 cm., a posebno je interesantna obrada drveta u unutrašnjosti džamije, na minberu i ćursu. U haremu džamije nalaze se veoma stari nišani sa stiliziranom obradom i natpisima na arapskom jeziku iz 17. vijeka, koji su također proglašeni nacionalnim spomenikom pod zaštitom države.



*Restaurirana džamija u Špionici*

U restauraciju ove džamije je utrošeno 119.000 KM, koje su obezbijeđene od Federalnog ministarstva nauke, kulture i sporta i Općine Srebrenik. Izvođač radova je građevinska kompanija «Gromex» d.o.o. iz Srebrenika, dok je arhitekta Ibrahim Bajrektarević. Završetkom restauracije Stare džamije u naselju Špionica Donja, koja je od Centra Srebrenika udaljena 7 kilometara, uz već od ranije poznati lokalitet Starog grada Srebrenika, čije zdanje datira iz 1333.godine, staru kuću Suljagića kao i mlinova u Gornjim Hrgovima, ovo općinsko područje bi, agresivnijom i kvalitetnijom propagandom, u narednom periodu, trebalo postati još prepoznatljivije na turističkoj mapi BiH.

## KULTURA

## U Srebreniku održana premijera filma "Snijeg"



*Sa premijere filma «Snijeg»*

Centar za kulturu i informisanje, publici u Srebreniku je premijerno predstavio film «Snijeg» Aide Begić. Film prati priču šest žena, jednog starca, četiri djevojčice i jednog dječaka koji žive u ratom razorenom i izoliranom selu Slavno. Jedina nada u opstanak i ostanak mještana je proizvodnja i prodaja ekološki zdrave hrane, a nakon što dva poslovna čovjeka posjete selo i zatraže od seljana da ga napuste uz novčanu naknadu, među mještanima dolazi do podjele. Oni su pred dilemom - prihvatiti ponudu i spasiti živote, ali ujedno razoriti vlastite duše. Iako se radi o sumornoj životnoj drami film odiše optimizmom uz poruku da je bolje sutra, uz velika odricanja i upornost, ipak moguće. Dugometražni prvijenac Aide Begić ovogodišnji je bosanskohercegovački kandidat za najprestižniju filmsku nagradu - Oscar. Film je svjetsku premijeru imao na Cannes Film Festivalu, gdje je osvojio Grand Prix programa «Sedmica kritike». Nakon 14. Sarajevo Film Festivala, "Snijeg" je prikazan na brojnim svjetskim filmskim festivalima. Nakon prikazivanja filma, oko 350 gledalaca je aplauzom pozdravilo rediteljku Aidu Begić i glumicu Vesnu Mašić. –Film nisam pravila za filmske festivale, iako je isti obišao brojne svjetske filmske festivale i osvojio značajne nagrade, nego za naše gledaoce i veoma mi je drago da ste razumjeli poruku filma te da je naišao na ovako dobar prijem-istakla je Aida Begić u kratkom obraćanju srebreničkoj publici.

## "Tajna čarobne kutije"

U Srebreniku je 28.11.2008.godine promovisana knjiga Hazima Hodžića, «Tajna čarobne kutije». Profesoru Bosanskog jezika ovo je sedmo književno djelo u karijeri, a promotori «Tajne čarobne kutije» bili su Zlatko Dukić i Atif Kujundžić. Govoreći brojim gostima, koji su došli da podrže ovo djelo rođenog Srebreničanina, Dukić je između ostalog kazao da Hodžić, u ovoj autobiografskoj knjizi, poštuje djecu i djetinjstvo, te da uglavnom piše o vremenu kada je odrastao. Pisac se uglavnom fokusirao na djetinjstvo koje je bilo na granici siromaštva, pa je postalo upečatljivo njegovo radovanje kriški bijelog hljeba, koja je u tom vaktu bila prava rijetkost, kao i keksu za kojeg su djecu bila spremna na sve.



*Sa promocije knjige Hazima Hodžića*

## Izložba keramike Halide Emrić

U Srebreniku je nedavno održana izložba keramičkih predmeta Halide Emrić iz Bužima! Riječ je o umjetnici koja je svoj stvaralački čin osvijestila u tvoračkom aktu, realiziranom, ne u boji rasutoj u platnu ili klešući u kamenu već u istinski osobenoj materiji-glini, u njenoj mekoti pronašla onu izdašnost koja se nudi beskrajnom modeliranju prevodeći njenu materijalnu supstancu u drugo stanje.



*Sa izložbe Halide Emrić*

## ŽIVOT

### Boračkoj populaciji 624.500 KM



*Sa potpisivanja ugovora*

U Srebreniku je, krajem septembra, 46 porodica iz reda boračkih populacija (demobilisani borci, porodice šehida i RVI) potpisalo ugovore o dodjeli bespovratnih sredstava za rješavanje stambenog pitanja sa područja općine Srebrenik. U pitanju je 624.500 KM bespovratnih sredstava koje su dodijeljene korisnicima iz gore navedenih populacija i ovaj projekat egzistira od 1999.godine. – Ovim je završen jedan proces koji je općinska Služba za boračku zaštitu započela zajedno s nama iz Ministarstva za boračka pitanja u Vladi TK. Dakle ovih 624.500 KM je pomoć u stambenom zbrinjavanju ovih 46 korisnika, koji žive na području općine Srebrenik i koji su imali najveći broj bodova. Od samog početka realizacije ovoga projekta, do sada je na područje općine Srebrenik, na ime pomoći za 467 korisnika, transferisano ukupno 4.196.000 KM. Kada se ovaj iznos podijeli, dobije se podatak da je svaki korisnik dobio po približno 9.000 KM. Na području Tuzlanskog kantona dodjeljuje se ukupno 7.336.000 KM. I u sljedećoj godini ćemo u budžetima planirati određena sredstva za ove kategorije, kazao je Bahrija Mehurić, ministar za boračka pitanja u Vladi Tuzlanskog kantona.

### Penzioneri na banjском liječenju u Gradačcu

Grupa od 15 penzionera sa područja općine Srebrenik nedavno je uz pomoć Općine Srebrenik otputovala na banjско liječenje u Gradačac. Kako je istakao Rašid Okić, predsjednik Izvršnog odbora penzionera-umirovljenika Srebrenik, ovih 15 penzionera će u banji «Ildiža» u Gradačcu boraviti 10 dana. Prethodno je jedna grupa penzionera, tokom ljetnih mjeseci boravila u banji, dok će preostali put banje, koju izaberu, tokom decembra ove godine. Na taj način ukupno 34 penzionera će iskoristiti pogodnosti banjског liječenja tokom 2008.godine. – Zahvaljujem se općinskom načelniku Suljagić Osmanu, koji je, za realizaciju ove akcije, iz budžeta obezbijedio 7000 KM sredstava, dok su približno ista sredstava dali i penzioneri.



*Odlazak penzionera u banju*

### Učenci iz Srebrenika u humanitarnoj akciji

Nedavno je u Srebreniku završena akcija prikupljanja hrane pod nazivom «Učenci i studenti pomažu narodnu kuhinju Imaret u Tuzli» koju je organizovalo Muslimansko dobrotvorno društvo «Merhamet RO Tuzla». Ova akcija trajala je od sredine Ramazana a uspješno je okončana i na području općine Srebrenik, kroz realizaciju u svim osnovnim i Mješovitoj srednjoj školi Srebrenik. –Ovom akcijom želimo razviti osjećaj kod djece za humanost, da treba pomagati one koji nemaju dovoljno hrane,



*Dobar odziv učenika*

te da ih ne smijemo zanemariti i zaboraviti, kazao je Osman Mujić, predsjednik Merhameta u Srebreniku. Prikupljeni su uglavnom brašno, šećer, ulje, riža, so, luk, krompir, ali o ostale namirnice. Izuzev ove akcije, Merhamet je pokrenuo i akciju pripremanja bajramskih paketića za djecu sa posebnim potrebama prve i druge kategorije.

### Fahir Zukić donirao pakete

Uoči ramazanskog Bajrama u Lisovićima je upriličen obilazak starih, bolesnih i iznemoglih mještana ovog naselja kojima su uručeni i prehrambeni paketi. Kao i ranijih godina, kupovinu paketa, čija je vrijednost oko 500 KM, vlastitim sredstvima finansirao je Fahir Zukić, predsjednik MZ Lisovići.



*Zukić je i ove godine donirao*

Uz kupovinu bajramskih paketa, ovaj istinski humanista koji radi u Švicarskoj, uoči Bajrama obišao je i Faika Delića u susjednim Previlama, koji ima teško bolesnog i potpuno slijepog sina. Tom prilikom Zukić mu je donirao 500 KM za finansiranje priključka struje u njegovu novu kuću.

## U Srebreniku obilježen Dan penzionera



*Težak položaj penzionera*

Penzioneri s područja općine Srebrenik svečanom sjednicom u Plavoj sali Centra za kulturu i informisanje obilježili su 25. oktobar - Dan penzionera FBiH! Predsjednik Udruženja penzionera sa ovog općinskog područja Rašid Okić, između ostalog podsjetio je na 25. oktobar 1997. godine, kada je više od 100.000 penzionera izašlo na proteste u Sarajevu kako bi ukazali na izuzetno slab status u državi. U pitanju je najugroženija populacija u BiH, čija većina živi na rubu egzistencije. Okić je govorio i o nedosljednosti primjene člana 136. Zakona PIO-a kojim se onemogućava povećanje penzije od 1. avgusta. Ipak, na sjednici je naglašeno kako je Vlada TK-a krajem 2007. godine pomogla ovu populaciju sa 21.830 KM, čime je barem donekle poboljšan materijalni status penzionera sa područja općine Srebrenik. Također, apostrofirano je da ni Općina Srebrenik ne zaboravlja na penzionere tako da se u posljednjih nekoliko godina iz općinskog Budžeta izdvajaju određena namjenska sredstva za banjsko liječenje penzionera, a jedna grupa penzionera je nedavno otputovala na liječenje u gradačačku banja «Ilidžu». Penzioneri su svjesni da je u cijeloj BiH izuzetno teško socijalno stanje, a oni vjeruju kako će i za njih doći bolji dani. Kako to i priliči svečanoj sjednici podijeljene su i nagrade zaslužnim pojedincima.

## Udružuju se privrednici Srebrenika, Gradačca i Gračanice

Privrednici iz Srebrenika, Gradačca i Gračanice u prostorijama upravne zgrade «Kopexa» u Srebreniku, nedavno su održali sastanak, koji je imao za cilj iniciranje osnivanja Udruženje privrednika na nivou ove tri općine. –Cilj ovog sastanka je da se razmijene iskustva iz dosadašnjeg rada i da se usaglasimo kako dalje raditi. Mi hoćemo da postanemo partner oficijelnoj vlasti, kako na nivou općina, tako i na nivou kantona, federacije pa i države i da pokušamo artikulirati naše probleme.



*Ekrem Omerović*

Jednostavno želimo da imamo što bolje uslove za rad. U narednom periodu dana napraviti ćemo još jedan sastanak, gdje ćemo definirati sve detalje u vezi ovog našeg plana, kako bi od 2009. godine ostvarili svoja veća prava, kazao je predsjednik Udruženja privrednika općine Srebrenik, Ekrem Omerović. Na naredni sastanak bit će pozvani i načelnici općina kako bi se i oni direktno uključili u realizaciju ovoga projekta.

## Planinari održali Skupštinu

Planinarsko društvo «Majevice» tokom proteklog vikendna održalo je redovnu godišnju Skupštinu, na kojoj je usvojen Izveštaj o radu ovog društva u proteklog godini, a razmatran je i finansijski Izveštaj koji će biti usvojen do kraja kalendarske godine. Planinari «Majevice» aktivni su tek jednu

godinu, a za ovaj period uradili su dosta toga. Kako je kazao predsjednik Skupštine Svjetlan Bešić, osnovni cilj planinara je da se približe građanima, zatim druženje na čistom zraku, kao i da se dodatno uredi planinarski dom «Lipici» koji je nedavno i rekonstruisan.



*Planinari su veoma aktivni*

Ovaj dom je jedan od najljepših koji posjeduju planinari u BiH, a uskoro slijedi i njegova dogradnja kao i uređenje okolice.

## Uz Dan dijabetičara




*Okolo 300 građana je kontrolisalo šećer u krvi*

U povodu Svjetskog dana borbe protiv dijabetesa, Udruženje oboljelih od dijabetesa Srebrenik, u saradnji sa srebreničkim Domom zdravlja, na trgu Alije Izetbegovića u Srebreniku, organiziralo je besplatnu kontrolu šećera u krvi. Zainteresiranim građanima besplatno je mjereno i krvni pritisak, a distribuirane su i brošure i ostali prigodan propagandni materijal. Prema riječima Fuada Hadžića, predsjednika Udruženja dijabetičara Srebrenik, priliku za besplatnu kontrolu šećera u krvi iskoristilo je blizu 300 građana, a prema posljednjim podacima na području općine Srebrenik registrovano je 680 dijabetičara.

## ŽIVOT

### Istraživanje "Orlove klisure"



*Orlova klisura u Potpeću*

Predstavnici sportskog i naučno-istraživačkog kluba Atom iz Zavidovića, nedavno su izvršili istraživanje u «Orlovoj klisuri», u Potpeću kod Srebrenika. Pećina je duboka svega 20 metara tj. ulazno predvorje oko 10-ak metara i još jedan kanal širine 1,5m i dužine 10 metara u dubinu stijene. Na ulaznom dijelu su pronađeni ostaci duže vremena korištenog ognjišta i ono što je najznačajnije tragovi građevinskih zahvata u pećini. Naime, u zidovima ulaznog predvorja vidljivi su vještački načinjeni otvori koji su očito služili kao uporišta za neku drvenu konstrukciju koja je imala i funkciju stepeništa za ulazak u pećinu. Slične primjere imamo u pećinama Ljestvače na prilazu srednjovjekovnom Bobovcu, kao i isposničkim ćelijama u Katinom potoku kod Visokog. Još jedno zanimljivo otkriće su i vještački isklesani nogostupi na jednu, možda takođe vještački isklesanu policu koja je, možda imala, funkciju za neke vjerske obrede, čije tragove vrlo često pronalazimo u bosanskim pećinama. Vidljiva je i «izlizanost» tj. uglačanost nogostupa što nam govori o dosta čestom korištenju. Sve nam ovo govori da ova pećina zaslužuje pažnju za arheološka istraživanja i da nudi, zajedno sa ostalim bosanskim pećinama sa sličnim sadržajima, odgovor na dosta zanimljiva pitanja iz historije BiH.

### U Gornjim Hrgovima "Dani kruha i plodova zemlje"

Na prekrasnom «Ranču» Ive Marojevića u Gornjim Hrgovima, sredinom oktobra je održana manifestacija «Dani kruha i plodova zemlje» pod pokroviteljstvom HKD «Napredak» Srebrenik. Manifestaciju je otvorio načelnik Općine Srebrenik Osman Suljagić, a prije toga prisutnima se obratio hrvatski konzul u BiH, Josip Juras kao i predstavnici HKD «Napredak».



*Bogata trpeza na manifestaciji*

Predstavljeni su proizvodi od zdravih domaćih plodova, tradicionalna jela domaće kuhinje, zdravi proizvodi od domaćeg pekmeza, meda, suhog voćahošafa, domaća rakija «Hrgovljanka», tikvica... Na ovoj manifestaciji bili su prisutni i predstavnici iz Tuzle, Orašja, Brčkog, Srebrenika, i dr. Šest knjiga kao specijalne nagrade su podijeljene učenicima područne OŠ «Gornji Hrgovi», za recital i likovne radove, dok je ista škola dobila i specijalno priznanje. Zapažen su nastup imali Nikola Veselić, Marijan Marojević i Ivo Marojević, sa svojim proizvodima, a pažnju je privukla najbolja voda sa izvora «Zdravnik», sa obronaka planine Majevice, koja se ne može naći u slobodnoj prodaji nego se uglavnom izvozi u inostranstvo.

### Svjetski dan hrane



*Svjetski dan hrane*

Pravo na hranu kao i pravo na život je jedno od temeljnih ljudskih prava, proklamovano u univerzalnoj Deklaraciji o pravima čovjeka, poruka je sa javne tribine koja je u Srebreniku organizirana na temu «Pravo potrošača na zdravstveno sigurnu i kvalitetnu hranu», a koja je održana u povodu 16.oktobra, Svjetskog dana hrane. Svjetska organizacija za hranu i poljoprivredu (FAO) i Svjetska zdravstvena organizacija (WHO) žele do 2015.godine za polovinu da smanje broj gladnih ljudi na svijetu. Problem gladi naročito je izražen u ratnim zonama kao i u Africi. Na svijetu svake minute umire 25 ljudi, a za njihov spas potrebna su sredstva koja se u svijetu izdvajaju za naoružanje. UN procjenjuju da je više od 850 miliona ljudi gladno...

### Ustrijeljen vepar od 200 kg.



*Lovci LD «Majevice» sa ulovom*

Članovi Lovačkog društva «Majevice» sekcija Srebrenik, nedavno su, prilikom posljednjeg lova na Majeveci, na lokalitetu Dub, ustrijelili vepara kapitalca teškog oko 200 kg. U lovu je učestvovala grupa od 30 lovaca, a uspješni strijelac je bio poduzetnik iz Srebrenika Asim Mujezinović.

## SPORT

## Odbojkaši "Gradine-Ingram" jesenji prvaci



«Plavi» su jesenji prvaci

Odbojkaši «Gradine-Ingram» jesenji dio šampionata okončali su na prvoj poziciji u Prvoj ligi FBiH, čime su se okitili jesenjom titulom. Izabranici Nermina Mujkanovića predvođeni odličnim partijama Imamovića, Bešlagića, Slanjankića, Šabića, Ibračevića..., uspjeli su da u «prvom poluvremenu» preskoče sve prepreke, ostvarivši ukupno devet pobjeda, a posebno je važna ona u Lukavcu, nad direktnim konkurentom za ulazak u Premijer ligu. –S obzirom da smo jesen okončali na prvom mjestu, bilo bi neozbiljno da kažem kako nisam zadovoljan. Međutim, naše igre nisu uvijek bile na željenom nivou, i to je ono s čim nisam sretan. Velike poteškoće nam predstavlja to, što je većina naših igrača zaposlena i tako ne mogu redovno da treniraju, a vrlo često ni da igraju prvenstvene utakmice. Za očuvanje prvog mjesta i direktnog plasmana u Premijer ligu, potrebna su nam i određena pojačanja za proljeće, kako nam ne bi iskliznulo prvo mjesto, kao u prošloj sezoni, kaže šef Stručnog štaba «Gradine-Ingram», Nermin Mujkanović. Ovaj nekadašnji član šampionske generacije «Gradine-Ingram» koja je 1995.godine, BiH predstavljala u Kupu šampiona za sada se dobro snalazi u ovoj ulozi.

## Košarkaši "Gradine" započeli takmičenje u A2 ligi FBiH

Po prvi puta u historiji općine Srebrenik, početkom novembra je odigrana i prva zvanična seniorska utakmica u košarci. Naime, košarkaši «Gradine» započeli su takmičenje u A2 ligi FBiH, u kojoj su na samom startu, sa nekoliko pobjeda, pokazali da će ovaj sport u Srebreniku imati svijetlu budućnost. Prve pobjede, u ovome rangu takmičenja, govore kako je pred našim mladim košarkašima velika perspektiva.



Košarkaši «Gradine»

– Naša ekipa ima u prosjeku 17 godina i riječ je o veoma mladom timu koji iz utakmice u utakmicu igra sve bolje. Bez obzira što smo debitanti u ovome rangu takmičenja, zasigurno ćemo mnogima pomrsiti račune, kaže šef Stručnog štaba, Edis Bajrektarević.

## Dragi Filipoviću šahovski turnir



Drago Filipović

U okviru obilježavanja 25. oktobra, Dana penzionera Federacije BiH, Udruženje penzi-

onera općine Srebrenik organiziralo je tradicionalni šahovski turnir, na kojem je učestvovalo 16 srebreničkih penzionera. Pobjednik turnira je Drago Filipović, na drugom mjestu je Taib Jahić, treću poziciju izborio je Mustafa Halilović, na četvrtom mjestu je Jašar Smajlović, dok je na petoj poziciji Ibrahim Smajlović. Najuspješnijim takmičarima predsjednik Udruženja penzionera općine Srebrenik Rašid Okić, uručio je diplome i prigodne novčane nagrade.

## "Čehaje SDA" pobjednik Bajramskog turnira

Pobjednik Bajramskog malonogometnog turnira u Srebreniku, koji je, povodom Ramazanskog bajrama, održan u Sportsko-rekreativnom centru, je ekipa «SDA Čehaje». Na turniru koji je organizovala «Asocijacija mladih SDA» učestvovalo je 18 ekipa s područja srebreničke općine a ekipa «SDA Čehaje» predvođena trenerom Fahrudinom Ahmetovićem-Loki-jem, bila je bolja od «Arizone» rezultatom 4:3, dok je treću poziciju izborila «Obuća Tesano».



«Čehaje SDA» najbolji

Nagrada za fer-plej pripala je «Frankopan» iz Špionice, epitet najboljeg igrača turnira ponio je Samson Šabuljić iz ekipe «Arizona», dok je najbolji golman Admir Begović iz pobjedničkog tima, inače malonogometni reprezentativac BiH. Najboljim ekipama i pojedincima uručeni su pehari i diplome, te novčane nagrade u ukupnom iznosu od 1.750 KM.

## EKOLOGIJA

# Predstavljene eko-kabine, inovacija Abdulaha Smajlovića



*Načelnik Osman Suljagić je prvi otvorio kabine*

Svečanim uručjenjem ključeva načelniku Općine Srebrenik, Osmanu Suljagiću, početkom decembra je u Srebreniku završen projekat postavljanja 15 eko-kabina za odlaganje otpada sa početnom reciklažom, na najfrekventnijim mjestima u Centru Srebrenika! Projekat je finansiran sredstvima Općine Srebrenik uz pomoć federalnog ministarstva za razvoj, poduzetništvo i obrt te kantonalnog ministarstva za zaštitu okolice. U pitanju je inovacija Abdulaha Smajlovića, vlasnika firme «MOM» iz Srebrenika, tj. proizvod za razdvojeno odlaganje otpada (posebno organski a posebno reciklirani otpad) iz domaćinstava, koji ima sljedeće karakteristike: proizvodi se od ekoloških prihvatljivih materijala u željenim bojama, kabina se montira od elemenata na licu mjesta, po potrebi lako se demontira i premješta, tako da se uklapa u postojeći okoliš i ne remeti regulacioni plan, sadrži dvije posude pa je prilikom odlaganja omogućeno početno razdvajanje otpada na mjestu nastanka, otpad je sklonjen od uticaja i rasipanja pa je smanjena mogućnost širenja zaraza, a spriječeno je i širenje neugodnih mirisa, požara ili okupljanje životinja. –Ovo je prije svega promocija projekta zaštite čovjekove okoline i mi iz izvršne i zakonodavne vlasti pružili smo maksimalnu podršku ovome projektu, kazao je načelnik Općine Srebrenik, Osman Suljagić.



*Predstavljanje eko-kabina pratili su brojni gosti*

### BROJNI GOSTI NA CEREMONIJI

Ovoj ceremoniji između ostalih prisustvovali su Kemal Mujkić, predsjednik inovatora TK i potpredsjednik asocijacije inovatora BiH, zatim Husein Hujić, generalni sekretar inovatora BiH i član Izvršnog komiteta svjetske federacije inovatorskih organizacija, Muhamed Omerović, predsjednik Udruženja «Eko-zeleni» TK, Zdravko Čedović, pomoćnik ministra za razvoj, poduzetništvo i obrt u Vladi FBiH, Goran Mišić, pomoćnik ministra za zaštitu okolice, Vehida Selimbašić, šef Katedre za Eko-zaštitu u ime Univerziteta u Tuzli, Mahira Filipović-Đikić, pomoćnik ministra za prostorno uređenje FBiH, Nurdin Mahmutbegović, pomoćnik ministra za obnovu, razvoj i povratak TK, Ranka Kubiček profesor na Univerzitetu u Tuzli...

Ova inovacija Abdulaha Smajlovića, koliko god izgledala jednostavna, osvojila je srebrne medalje u Moskvi, Ženevi, Parizu, Strazburu, te bronzane medalje u Nirnbergu i Zagrebu, što govori da bi ove eko-kabine trebale pronaći svoju adekvatnu primjenu u budućnosti.



*Abdulah Smajlović je predstavio eko-kabine i na sajmu «ZEPS 2008»*